

**IZVOD IZ STENOGRAMA S TREĆE SJEDNICE GRADSKOG VIJEĆA TUZLA
ODRŽANE 30. JANUARA 2025. GODINE U POSLOVNOM OBJEKTU
„GRAFIČAR“ U 10 SATI**

SJEDNICI PRISUSTVUJE 30 VIJEĆNIKA

ANA PEJIĆ – predsjedavajući Gradskog vijeća Tuzla

Prelazimo na tačku dva dnevnog reda:

DONOŠENJE ODLUKE O PROMJENI STATUTA GRADA TUZLE

Predlagач: 11 vijećnika Gradskog vijeća Tuzla.

Da li ima potrebe za uvodnim izlaganjem? (Nema.) Nema.

Da li ima...U stvari otvaram raspravu Klubova vijećnika.

Da li se neko javlja ispred Klubova vijećnika? Vijećnik Mirnes Ajanović evo javio se.

MIRNES AJANOVIĆ – vijećnik BOSS – Bosanske stranke

Hvala predsjedavajuća. Malo glas proklizava al okej je. Posljedica je bila neke viroze koja je prošla al ostala još malo a i danas se puno govorilo.

Mi smo već raspravili u uvodu praktično prilikom rasprave o uvrštavanju u dnevni red o ovoj tački i ja ne bih ni ja sad nešto naročito više. Rekli smo razloge koji su bitni za, za ovu tačku dnevnog reda. Samo trenutak. Dakle, mi smo svi zauzeli stav. Sve političke stranke osim njihove stranke koja se zove Naša stranka. Ne mogu tako ni reć da idemo u okolnost rješavanja problema uspostavljanja savjeta u mjesnim zajednicama do nekakve mogućnosti uspostavljanja i političkog i međunacionalnog i u glavi raznih ljudi lokalnih šerifa da možda nekad bude bilo moguće da dođe do izbora u mjesnim zajednicama a da do tada obezbjedimo okolnost da kao što je to bilo proteklih 20 godina na isti način vijećnici koji su dobili legitimitet da odlučuju o Tuz-li u svakom centimetru Tuzle dakle, u svakoj mjesnoj zajednici nebitno gdje su dobili bilo kakav rezultat. Niko nema pravo sad reći mene ne interesuje ova mjesna zajednica tamo su nešto malo glasali za mene. Nema toga. Mi smo svi dobili legitimitet i izborni rezultat da zastupamo sve građane i ko god na bilo kakav način krši to onda nije dobar vijećnik. I sad u situaciji kad građani su iz mjesnih zajednica faktički gdje ne mogu bit nigdje nego u mjesnim zajednicama. Jer neko kaže: Pa iz mjesnih zajednica su glasali kao da je to nešto iz vana iz Tuzle. Ne bih preširoko. Samo nako ukratko znaju svi o čemu mislim na one koji su to radili. Dakle, glasali su građani svi svih mjesnih zajednica i da-li legitimitet da mi danas budemo ovdje. Neko jednog. Neko više. Neko mnogo više al mi smo ti koji imamo po Ustavu BiH, po izbornom Zakonu legitimitet da odlučujemo. I šta smo mi to? Jesmo li to mi zločinci? Jel to mi nešto ne valjamo, netrebamo? Jel to sad neko treba drugi da se brine o građanima koji su glasali za nas? Apsurdno je pričati priču kako mjesne zajednice trebaju da imaju nekog svog predstavnika. Mi smo ti. Vijećničke inicijative, pitanja po Statutu Poslovniku svako ima pravo dostaviti na Vijeće iz svih mjesnih zajednica zahtjev za bilo kakvo delegiranje bilo kakvog problema, rješenja, pitanja, bilo čega. Sve je otvoreno. Mogu prisustvovati sjednicama Vijeća. Šta sad? Odjedanput se pravi od nas da pričamo budalaštine, da smo...pričamo gluposti što bi se reklo da smo budale i glupi kako to kaže Omer u budalaštinama i glupostima zato što treba da trošimo tih nekih otprilike oko pola miliona maraka bi koštali ti izbori. Samo izbori. Umjesto da damo da pokrije se ova razlika u Domu penzionera. Pokrijemo razliku za GIPS. Za učenike, penzionere. Nezaposlene. Zar je logično da neko sad smatra da te pare treba dat zato? Nije.

Nemamo tih para sad. Ne trebamo nam to. A gdje to možemo uraditi bez i jedne marke. Ni jednu jedinu marku nećemo potrošiti. Predstavnici političkih stranaka koji su dobili pravo da odlučuju u ime svih građana procentualno koliko imaju dobijenog izbora na cijelom području grada u tom odnosu, u odnosu na broj mjesnih zajednica predlažu članove savjeta. Vijeće glasa o tome i ukoliko ne valja bilo ko od njih Vijeće ima pravo da ih smijeni. Ovako kad ih izaberete po mjesnim zajednicama ko će ih smijeniti? Niko. Mogu radit šta hoće. Sklope dvije-tri mjesne zajednice i eto ga lokalni šerif hoću i ja da budem načelnik. Rekao sam to već. Oni će onda kad bi dobili to pravo a imaju po Zakonu o konstituisanju opština na području Federacije. I brojne opštine su konstituisane po tom zakonu. Još ću jednom reć. I CIK- Centralna izborna komisija prihvata da opština može imati i manje od 10.000 stanovnika. Dakle, dvije-tri mjesne zajednice u Tuzli koja ima po izbornom rezultatu 120-130.000 ima ih mnogo i više ali nije ni važno, odnosno po statistici Centralne izborne komisije. Dakle, dovoljno je tri-četiri zajednice mjesne kad izaberu svoje predstavnike nađu eh ovaj će bit kaže lokalni šerif ovo će biti zamjenici i da mogu da rade šta hoće. Iz ovog razloga sve političke stranke s-ve osim njihove stranke koja se zove Naša stranka dakle, apsurdno je smatrati da jedna stranka koja je brutalno u Mostaru oduzelo prava Bosancima da izaberu nekoga ko je Bosanac ovde nama pametuje kako je to dobro, kako to treba i da lobira sa drugih strana kako to treba da ide i kako će oni sutra pokrenut proteste iz mjesnih zajednica protiv nas. Jel to ba Omere hoćeš da dovedeš ovdje proteste ljudi protiv Gradskog vijeća? Jel to cilj? Lako je skupit par kabadahija kome ćete dati kao što daje Dodik i onaj Vučić i ostali idite vi kao protestujte za mene pa vam obećat. Ništa se ti ne brini ba. Ti ćeš biti lokalni šerif, ti ćeš dobit dol da budeš to narod te izabro i daš mu još nešto malo para ti recimo ili bilo ko i da na taj način obezbjedite da protestuju protiv nas. E nećemo nikog lobirat. Gradsko vijeće nema šta lobirat koga pa da govori: Haj ti dođi nama potvrdi da je to u pravu. 500 hiljada maraka a zato će svaki građanin reći: Bolje daj penzionerima neg za te...Neću ja da kažem budalaštine košto on kaže. Iz tog razloga imamo ovu okolnost gdje mi predlažemo izmjenu Statuta. Et nećemo dirati. Nek stoji okolnost i mogućnost da nekad danas to reko nekad ne znamo kad može biti izbor ali do tada da se definiše na način kako sam već i rekao i kako je to bilo i prethodno ali moramo provest proceduru. Nažalost to se usvojilo u prošlom mandatu kad nisam bio tu. Ne bi to prošlo da sam bio. Nikoga ne krivim. Razumijem okolnosti, demokratija. Vidite dokle mi spuštamo demokratiju. Do apsurdnosti. Mi demokratijom smatramo...Kad je anarhija možeš radit šta hoćeš i pravit probleme kome hoćeš i ugroziti jedinstvo Tuzle. Rekao sam multietičnost Tuzle ne postoji bez jedinstva Tuzle. Ako dirnemo dio teritorije Tuzle nema više multietične Tuzle. Ona je samo jedinstvena ukoliko je cijela teritorija u okolnostima da gradonačelnik na cijeloj teritoriji može biti gradonačelnik i da Gradski vijećnici na cijeloj teritoriji kao i mi Gradsko vijeće odlučujemo o Tuzli. Sve ostalo je ubijanje Tuzle. Zato smo mi predložili ovo i eto provest će se procedura. Trajat će nažalost dva-tri mjeseca. Ne vjerujem da će moći prije. Ja bih samo da informaciju dobijemo jel mora biti 30 dana javna rasprava jer tad bi ušli onda u onu situaciju da bespotrebno radi ovih par dana da Vijeće koje bi trebalo da bude da se može donijeti odluka bilo prolongirano da pogledamo šta je. I još jednom da kažem da nekoliko puta je ovo Vijeće odlučivalo i 2008. godine i 2013. godine. Ovdje imam i taj dokument. I 2016. godine donijelo je deklaraciju koja je objavljena u Službenom glasniku, rezoluciju u Službenom glasniku o suprotstavljanju podjele Tuzle i drugih gradova i opština gdje je jasno rečeno demokratskim i svim sredstvima će se Vijeće suprotstaviti svim koji budu atakovali na tuzlansku cjelovitost i multikulturalnost i apeluje na sve građane da ne nasjedaju na obmane onih koji pod isticajem decentralizacije lokalne samouprave namjeravaju narušiti jedinstvo Tuzle. Upravo ovo radi Omer. Suprotstavlja se daakle, deklaraciji koja je objavljena u Službenom glasniku 010514462008 koja je potvrđena rezolucijom 10.05.2016. godine broj: 010530442016 između ostalog Vijeće izražava zabrinutost...Ovo citiram iz deklaracije. Namjera na posljednjoj vanrednoj sjednici pod plaštom decentralizacije lokalne samouprave. Ovo radi upravo Omer. Govori da je to

centralizacija da to treba. Dakle, identič-no. Tad je bila tendencija određenih stranaka ista kao što to radi danas Omer Berbić. Izvršen pokušaj podmeta...A isteklo vrijeme je li? (ANA PEJIĆ – Imate još minutu.) Hvala. Okej. Samo da završim. Izvršen pokušaj podmetanja Općinskom vijeću da glasa za ustrojstvo koje bi lokalnim moćnicima omogućilo podjelu Tuzle na nacionalne opštine te svjesni kontinuiranih ataka koji bi se dobili kako bi se dobilo pravno uporište za referendumsku secesiju. Općinsko vijeće traži da se hitno i precizno izvrši sve što je potrebno. Dakle, govorimo...Tad smo raspravljali satima. Mensur je rekao. Ta sjednica trajala je do šest ujutro. U devet je počela. A koliko je to sati kad bi računali? U devet jedan dan. Šest sati ujutro se završila. Ne smijem ni računat. (ANA PEJIĆ – Možete samo voditi računa o vremenu jer je isteklo ili se javiti u sljedećem krugu za diskusiju.) Pa evo. Aha. Okej. Ništa. Okej. Razumijem. Toliko.

ANA PEJIĆ

Replika. Vijećnik Omer Berbić. Izvolite.

OMER BERBIĆ – vijećnik Naše stranke

Ja smatram da je ponavljanje svojstvo papagaja. Ja se ne osjećam niti mogu biti papagaj i ono što smo razgovarali da je bi-la dopuna dnevnog reda stojim kod svega što sam rekao od a bit seto od početka do kraja. I ne želim da ovdje odgovaram na ove više evo da ne kažem gluposti da me ne napadne, al na ove nebuloze, nema potrebe za tim. Ovo nek priča u vjetar. Ja ono što sam rekao stojim kraj toga. I opet ću ponoviti svoj stav kada to dođe vrijeme a to je na amandman. Jer ovo sada što se pokreće nije ovo što se prezentuje. Ovo što se pokreće izmjena Statuta. U ovoj izmjeni Statuta mi možemo učvrstiti našu želju da idemo na demokratske izbore u savjete mjesnih zajednica i to je jedino što se ovdje pokreće. Tako da što se mene tiče u ovom procesu nema ništa sporno dok ne dođe do implementacije. A ja ću, kao što sam i predložio amandman na program rada da mi...predložiti da mi u martu raspravljamo o onom što je naša statutarna obaveza i to pravnicima ovdje mogu da shvate ili ne žele. Ali da se raspravlja u martu o onom što je naša statutarna obaveza jer kršimo ovdje, kršimo prava građana Tuzle. Ne želim uopšte da raspravljam na u Vijeću da li je zemlja ravna ploča il je Tito bio Britanski špijun itd. o ovim nekim fiks idejama. To nije moja intencija. Sve eono što sam rekao na dopuni dnevnog reda stojim kraj toga od početka do kraja. I ovo je moja prva i vjerovatno i zadnja replika. Ja znam da će biti još provokacija. To je meni okej. Ako opet krene nisko bilo ko ovdje i ja ću isto udariti nisko. Do tada ja na ovoj tački se neću javljati nego ću glasati protiv.

ANA PEJIĆ

Zahvaljujem. (Fala ljepa.) Sljedeći izvolite vijećnik Mirnes Ajanović. Replika.

MIRNES AJANOVIĆ

Ma stvarno ne razumijem Omera nit ga iko po meni ne razumije. Šta ja to provociram? Ja samo čitam deklaraciju i rezoluciju ovog Vijeća o suprotstavljanju o podjeli grada Tuzla. Problem je što je to za njega izgleda provokacija. Za svakog ko je vijećnik u interesu multietničke jedinstvene Tuzle to ne može biti provokacija. To je poštivanje nasljeđa svih vijećnika koji su bili tad i raspravljali satima pa možda i danima. Nije možda. Sigurno je. Mensur i ja smo bili o ovako istoj situaciji. Identična situacija da se dozvole izbori u mjesnim zajednicama mi smo zauzimali ovakve stavove. Zašto je za Omera provokacija nešto što je

objavljeno u Službeno glasniku opštine Tuzla? Deklaracija i rezolucija. A onda još i vrijeđa. Ne zna odgovoriti ništa drugo nego da vrijeđa. Pa onda nekakav papagaj. Ne znam otkud mu taj papagaj u glavi. Ništa ja nisam rekao dalje. (ANA PEJIĆ – Vodite samo računa o vremenu obzirom da je replika u pitanju.) Znam. Nisam ja pomenuo da mi je tica u glavi. To to što je neko pomislio tamo ili se malo nasmijo to je ono što je izašlo iz toga. Ja sam samo pomenuo otkud mu taj papagaj? A onda smo mi danas slušali više puta otu nekaku kaže da je zemlja ravna. A onda Omer ima problem i s tim. Ja. Kakve veze ima sve ovo što mi radimo Omere s tim? Valda svi znamo kakva je. Ili haman ne znaš ti kakva je zemlja pa ti se stalno baviš time je li ravna ili nije. Te probleme ostavi sebi kod kuće. Imaš dedu, babu pa popričaj s njima.

ANA PEJIĆ

Sljedeći za diskusiju javio se vijećnik Zlatan Mehmedović ispred Kluba SDP-a. Izvolite.

ZLATAN MEHMEDOVIĆ – vijećnik SDP – Socijaldemokratske partije Bosne i Hercegovine

Evo ja se smatram dužnim da u ime Kluba Socijaldemokratske partije objasnim je li ovaj stav Socijaldemokratske partije vezano za ovu tačku dnevnog reda. Dakle, radi se o PRIJEDLOGU ODLUKE O PROMJENI STATUTA GRADA TUZLE. Želim da pojasnim građanima da izmjena Statuta Grada Tuzle nije kršenje statuta i da izmjene Statuta Grada Tuzle nisu konačne. Da se isto tako na ove izmjene ponovo je li mogu ovaj, izmjeniti. O ovoj tački postoji široki koncenzus i pozicije i opozicije pa s hodno tome moram reći da ona i predstavlja sigurno i odraz volje građana. Mi kao najjači politički subjekt koji participira u Gradskom vijeću Tuzle. Osobno evo ja sam pod velikim pritiskom građana i javnost mora znati da savjeti mjesnih zajednica praktično ne funkcioniraju i raspušteni su od jeseni. Ja bih rekao još od izborne kampanje (ANA PEJIĆ – Dva mandata vijećnika.) praktično. Vrlo posla je na sekretarima mjesnih zajednica. Neki su me čak zvali i prijete otkazima jer su toliko imaju posla i zahtjeva od građana da ne mogu da odgovore. Ovi svi bivši predsjednici mjesnih zajednica i ovaj, članovi savjeta non-stop takođe upozoravaju da rade praktično besplatno i onaj, kao neimenovani članovi savjeta mjesnih zajednica i ipak je li odgovaraju na brojne probleme građana Tuzle. S tim u vezi mi ćemo podržat prijedlog ove odluke a u cilju funkcionisanja savjeta mjesnih zajednica Grada Tuzle a do konačnog stvaranja uslova za održavanje ovih izbora u mjesnim zajednicama. I stav Kluba SDP-a je da mi danas nećemo ni diskutovati o izborima u mjesnim zajednicama nego ćemo diskutovati o njima kad za to dođe vrijeme. A sada kao društveno odgovorna partija moramo obezbjediti funkcionisanje savjeta mjesnih zajednica. Eto toliko.

ANA PEJIĆ

Zahvaljujem. Sljedeći za riječ javio se vijećnik Admir Hasanbašić ispred Kluba Tuzlanske alternative.

ADMIR HASANBAŠIĆ – vijećnik Tuzlanske alternative

Hvala predsjedavajuća. Pa evo zaista kolege su već mnogo toga rekli što sam ja zabilježio da kažem ispred Kluba Tuzlanske alternative. Međutim, evo ja ću istaći neke vrlo bitne stvari a to je zaista što ove izbore u mjesnim zajednicama znači, neće finansirati ni Centralna izborna komisija nego bi to bilo znači, iz Budžeta grada Tuzle. Kako smo saznali ta

bi sredstva bila puno, puno veća a znamo i vidimo kakve probleme sada imamo u gradu i vezano i za povećanje cijena javnog prevoza i Doma penzionera pa bilo bi mnogo bolje da se ovaj dio sredstava iz Budžeta koji je predviđen za izbore znači, usmjeri upravo na subvencioniranje bilo javnog prevoza bilo naših penzionera u Domu penzionera. Međutim, mi kao Klub ćemo svakako podržati ovu odluku o izmjeni Statuta Grada Tuzla jer pored ovoga što su kolege rekly da se ide na imenovanje članova savjeta mjesnih zajednica ima tu jako, jako puno propusta, nedostataka oko samog organizovanja iz-bora u savjetu mjesne zajednice. Znači Statut ni sada nije dobar i zaista sam ga čitao. Ima tu nedostataka koji bi mogli stvoriti problem. I upravo ćemo mi kao Klub djelovati i u tom segmentu ne samo znači, sa da se imenuju savjeti mjesne zajednice do izbora nego još neke dodatne stvari koje su jako, jako, jako bitne. Želim ovdje napomenuti da Klub vijećnika Tuzlanske alternative ne-će glasat ukoliko bude ova izmjena u ovome dijelu savjeta mjesnih zajednica i neće podržati ni jedan prijedlog ni jednog političkog subjekta, prijedlog člana savjeta mjesne zajednice ukoliko bude taj član dolazio iz mjesne zajednice a da ne pripada toj mjesnoj zajednici. Je rimali smo u prethodnom periodu. Želim to istaći. Da u Savjetu mjesne zajednice Požarnica delegiraju se članovi, odnosno ljudi iz mjesne zajednice Sjenjak. Zatim. Mjesna zajednica Breške ljudi iz Mjesne zajednice Kiseljak što je nekorektno, što je nepošteno. I upravo će Tuzlanska alternativa ov-dje dati poseban akcenat. Bi-lo ko da predloži mi zaista to nećemo podržati. Ali svakako znači, ova implementacija u ovom smislu kako bude predloženo. I znači, u javnoj raspravi ćemo učestvovati i svakako kažem još jednom dat ćemo svoje prijedloge za što bolji statut. Znači, ne samo izmjene u ovome dijelu oko imenovanja savjeta mjesnih zajednica privremenih nego i u ostalim dijelovima. Hvala.

ANA PEJIĆ

Zahvaljujem se. Sljedeći za riječ se javio Senad Mehmedinović. Nek se pripremi vijećnik Dejan Kovačević.

SENAD MEHMEDINOVIĆ – vijećnik Nezavisne liste „Sloboda“

Eh hvala ljepo. Poštovana predsjedavajuća, zamjenice, zamjenici, članovi Vijeća, predstavnici službi pozdravljam vas i sekretara. Nezavisna lista „Sloboda“ je podržala ovo. Igram slučaja smo tamo među prvim koji su se potpisali i to samo sjedili smo na tom mjestu tako da red je neki da se kaže nešto po pitanju ovog.

Ovdje u prijedlogu da se u Statutu Grada iza člana 96. uvrsti dakle, Dom obučavanja uslova za sprovođenje izbora u mjesnim zajednicama iz prethodnog člana dakle, mi podržavamo u potpunosti da se implementiraju rezultati izbora na-ročito zbog ovih aktuelnih dešavanja na nivou Grada Tuzle a to su dva problema. Jedan je ključan problem. Ponovo se vraćam na nešto što se zove gradski prevoz. A drugo. Evo sad su kolege to komentarisali. Problem oko subvencioniranja za Dom penzionera pa tamo imamo planiranih ako se ne varam 500.000 konvertibilnih maraka koji se možda može, razgovarat ćemo na sjednicama Vijeća pola usmjeriti Domu penzionera a pola vamo za subvenciju ali evo to je već sad stvar dogovora kako ćemo to rješavati.

Kada su u pitanju savjeti mjesnih zajednica mislim da imamo svi iskustva vezano za savjete mjesne zajednice i pitanje koje se treba postaviti u stvari jeste koliko uopšte članovi savjeta mjesnih zajednica bez obzira od koga predloženi koliko oni rade u mjesni...? To je jedno pitanje. Drugo je: Vi znate da smo mi tražili da se podnesu izvještaji o radu savjeta mjesnih zajednica. Znači, mi moramo da gledamo o strukturi ljudi koja će se dole imenovati. Ne govorim koji politički subjekt šta i kako. Članovi savjeta mjesnih zajednica znači, imaju pra-va a bogami imaju i obaveze a obaveze su te ako se ne varam a ispravite me da prema

Statutu Grada Tuzle savjeti mjesnih zajednica mjesečno mora-ju da održava-ju svoje sastanke. Ja informacije imam da se ti sastanci po mjesnim zajednicama ne održavaju i po nekoliko mjeseci. I možda mi da ubuduće donesemo neke odluke ovdje da vidimo koliko...Izvještajem o radu nemamo dokaze, odnosno ne vidimo da je taj savjet mjesne zajednice radio. Pa možemo dogovoriti da se bez obzira iz kojeg političkog subjekta da se nedaje podrška ljudima koji apsolutno ne održavaju sastanke, ne rade, ne djeluju itd. itd. Dalje. Statutom ako se ne varam na nivou godine savjet mjesne zajednice je obavezan da podnese izvještaj i građanima te mjesne zajednice na način da sazove sastanak, prošireni sastanak gdje trebaju da dođu građani i da prezentuju svoj izvještaj o radu i ja ne znam koliko od ovih 40 savjeta mjesnih zajednica to radi. Drugo. Kada je riječ o ovim izborima što bili pazite. Ovi građani koji su glasali, građani koji su izašli na izbore i to su građani. Znači, oni koji ni-su izašli na izbore su podržali one koji su izašli na izbore. Znači, ni-ko nije rekao građanima koji ne izlaze dajte nem...Izađi-te. Postoji među mnoštvom ovih subjekata osoba kojima se može dati podrška. Evo mi smo...Mi nismo politički subjekt znači, mi nismo politički subjekt. Mi smo krenuli sa par osoba da sjednemo i da razgovaramo i na kraju je to preraslo u nešto što je preraslo. Došli smo do 35 osoba. Nismo politički subjekt i imamo izborni legitimitet koji nam govori da mi možemo da imamo ljude po savjetima mjesnih zajednica. Ne vidim tu ni u čem što može da bude određeni problem. Dakle, mi jesmo za izmjenu Statuta u ovome dijelu da dođe do implementacije izbornih rezultata sa ovih lokalnih izbora. Da sredstva koja su planirana u iznosu od 500.000 konvertibilnih maraka da se to prebaci možda za sad pu-no potrebnije stva-ri i da se otkoči rad savjeta mjesnih zajednica koji u ovom trenutku apsolutno ni-su spo-na niti imaju ulogu između građana prema Gradskom vijeću, odnosno prema Gradskoj upravi. Hvala.

ANA PEJIĆ

Zahvaljujem se. Sljedeći za riječ se javio vijećnik Dejan Kovačević. Neka se pripremi vijećnik Emir Šahović.

DEJAN KOVAČEVIĆ – vijećnik HDZ – Hrvatske demokratske zajednice Bosne i Hercegovine

Hvala predsjedavajuća. Evo dužni smo ispred Kluba HDZ-a Bosne i Hercegovine da iznesem par stavova. Evo čisto da se primi k znanju da se ovdje jako diskutiralo o podjeli Tuzle po bilo kom osnovu. Evo samo da se zna da je stav HDZ-a Bosne i He...Kluba HDZ-a Bosne i Hercegovine da mi nismo ni za kakvu podjelu Tuzle ni po bilo kom osnovu.

Ono što sam htio naglasiti da HDZ Bosne i Hercegovine u Tuzli još davne 2012. godine inicirao i tražio donošenje kako tada Statuta Općine a i od 2014. godine Statuta Grada tako i Statuta mjesnih zajednica i izravnih izbora savjeta mjesnih zajednica. Kao osnova za usaglašavanje ovih akata sa Zakonom o principima lokalne samouprave Federacije Bosne i Hercegovine donesenim 2006. godine i Evropskoj povelji o lokalnoj samoupravi. Jer građani imaju pravo odlučivati u svojoj mjesnoj zajednici o bitnim pitanjima u mjesnoj samoupravi u kojoj oni žive. I HDZ Bosne i Hercegovine je za provedbu izravnih izbora u mjesnim zajednicama. Grad Tuzla je donjeo Statut 2021. godine u kome je propisana provedba izbora. Isto tako je važno naglasiti. Da bi se stvorili preduvjeti za provođenje izravnih izbora u savjetima mjesnih zajednica neophodno je donijeti niz provedbenih akata. Gradsko vijeće je u ranijem sazivu je usvojilo obrazac Statuta mjesne zajednice i donijelo je odluku o izgledu, upotrebi, čuvanju i vođenju evidencije o pečatu mjesnih zajednica sa područja Grada i to oba akta u formi Nacta. Po saznanjima u svih 40 mjesnih zajednica su usvojeni Statuti na koje treba Gradsko vijeće dati prethodnu saglasnost. Može se, Stručna služba to može provjeriti. U međuvremenu je save...U međuvremenu je savjetima mjesne zajednice istekao četvorogodišnji

mandat. Čini mi se 06.12. da su istekli mandati vijećnicima (ANA PEJIĆ – Jeste do kraja. Jeste.) i od tada u našoj loka...u lokalnoj samoupravi na teritoriji grada Tuzle savjeti mjesnih zajednica ne rade. Rade samo tajnice tj. sekretarice znači, mjesne zajednice ne rade. Niko nema ovlasti i nikakva prava niti se može bilo šta infrastrukturno ili bilo kako napraviti. Da bi se nastavilo sa ovim postupkom neophodno je donijeti i Odluku o načinu provođenja izbora u mjesnim zajednicama, zatim Odluku o postupku registracije i načinu vođenja registra mjesnih zajednica Grada Tuzle, imenovati povjerenstvo za provedbu izbora koje mora izraditi svoje akte i donijeti Odluku o raspisivanju izbora, planirati sredstva itd. itd. Znači, dosta odluka, akata od finansija pa nadalje. Obzirom da trenutačno nisu stvoreni preduvjeti za okončanje ovog postupka a da je članovima savjeta mjesnih zajednica istekao mandat i da savjeti mjesnih zajednica ne rade smatram da treba iznaći prelazno rješenje imenovati članove savjeta u tom periodu kako bi svi žitelji tih mjesnih zajednica imali kontinuitet rada i djelovanja kako bi mjesne zajednice ži-vjele. U tom pravcu ću podržati prijedlog Kolegija za imenovanje članova savjeta mjesnih zajednica u ovom periodu a uz prethodno stvaranje pravne osnove za implementaciju istih. Hvala.

ANA PEJIĆ

Zahvaljujem se. Sljedeći za riječ se javio...Replika. Vijećnik Mirnes Ajanović. Izvolite.

MIRNES AJANOVIĆ

Hvala kolegi, susjedu Dejanu jer smo tamo praktično u istoj zgradi. Pa kažu: Vidite kaže: BOSS i HDZ su u istoj zgradi. To isto kao da je nekakav zločin? Šta? Dobri susjedi. Vrlo korektni. Ja mi se nešto ko dogovorili. Tako dobili i što smo dobili. Dobili zgradu koja je memljiva. Još malo pa će se srušiti i svašta nešto i nema grijanja ja. Ali su zaista korektni susjedi i korektan vijećnik. Ne znam smijem i više dalje govorit? Može imat problema jer nekad politika je čudna. Svašta nešto neko odozgo može primjetiti i tražiti da se mijenja ali je kolega Dejan zaista vrlo korektan vijećnik i dužnost nam je to priznati. Onako ne zna se dok se ne kaže. Ali evo i HDZ je upravo na istoj liniji kao i Omer. Evo potpuno se potvrdilo to što smo mi govorili svašta nešto pa i da je ta bila inicijativa kad je bila prije a tad smo mi tad upravo reagovali i suprotstavili se i zaustavili. I one slike koje sam prikazivao i broj-ne su još bile su zaustavili smo. Dakle, interesantno sad ono ko ja i HDZ u istoj zgradi Omer i njihova stranka i HDZ na istoj liniji. Direktni izravni izbori a onda nakon toga otkud mi znamo šta može bit. Politika je čudna. Svašta se može desiti. Da se neko uslovi bilo kakvom većinom na Federalnom parlamentu a može. Bez HDZ-a ne može ništa. I Dodik može da bude prošlost i SDP, SDA, svi al HDZ ne može. Oni imaju takav status. Građani im dali povjerenje i to traje i kako izgleda i trajat će. Dakle, jedina sigurna konstanta u politici je i na Federalnom državnom nivou i gdje god su HDZ. E sad ova veza interesa Omera da gura ovo a ovo je bio nekakav interes. Pa i sad je. Evo kolega Dejan nek kaže da nije. I sad je interes...(ANA PEJIĆ – Molim vas samo vodite računa o vremenu.) Evo odmah da HDZ-a razotkriva svu politiku i ovo sve što radi Omer. Ali kolega Dejan je mnogo savjesniji vijećnik i shvata da nešto ne treba tražiti što zaista u ovom trenutku ne treba Gradu, da trebamo uspostaviti savjete i za razliku od Omera koji ima nekakav interes ili ga je neko privolio na to na nekakav način HDZ je u ovom smislu korektniji.

ANA PEJIĆ

Zahvaljujem se. Replika. Vijećnik Omer Berbić. Izvolite.

OMER BERBIĆ

Kad Mirnesu odgovara onda i on glasa s HDZ-om. Jel tako? Ukidel Mirnese za ovu vanrednu sjednicu plaćanja? Treba da ja sada tebe dovedem da si ti zajedno s njima glaso. Treba opet da vadimo neke knjige ovdje da vidimo ko to hoće da dijeli ko to hoće da spaja Bosnu, Tuzlu itd. Nije korektno. Jedi-no zašta se ja borim jeste da građani u mjesnim zajednicama imaju pravo na odlučivanje i da im ti ne postavljaš lju-de jer se zna našta to liči kad politika postavlja ljude. Zna se na šta liči. Zna se da se tu postavljaju ljudi koji ne dođu na sastanke iako je to možda i statutarna obaveza. Ne pojave se a dobiju plaćanja. I na to...To vi želite. Vi želite da one ljude koji ssu za vas radili na izborima, koji pišu po nekakvim portalima tamo izmišljenim itd. Koji pišu kako je Mirnes Ajanović borac za Tuzlu on je tam. Njih je...Da se njih postavi po mjesnim zajednicama i da im se zahvali. Da im date 5 hiljada maraka za mandat da oni mogu s tim parama šta hoće a šta će mjesna zajednica? Šta će ljudi koji tu žive imat od toga? Neće ništa. To je želja. Meni je jasna ta želja. Jel hoćete da kažete HDZ je nešto vamo tamo. Pa ni HDZ ni u jednoj mjesnoj zajednici ni na jednom izbornom mjestu nema više od 40%. Četrdesetak posto plus. Znači, ima 60% svi ostali parti...Mislim apsurdno je kad je čovjek došo ovdje i reko: Nećemo mi ništa da imamo. Sad opet nešto imputira. Znači, to je zaustavljeno ba. Nemojte više ljude prepadat u Tuzli. Dosta je ljudima i rata. Pa vidite da su izbezumljeni bolan. Pa ljudi iz ove države idu upravo radi takvih ko vi što ste kad god je nešto oko para da, da, da se ščepa, da se ščepaju te pozicije moći vi spomenete rat i sve gotovo, nestalo. Rat je najbitniji. Mi ćemo rat. Mi ćemo ocjepljenja. Mi ćemo dijelit. Mi ćemo ovo mi ćemo ono. Dajte više. Dosta je više s tom pričom. Dajte da nastavimo da živimo u Tuzli kako smo uvijek živjeli građanskim životom. Al moj stav je da mjesne zajednice treba depolitizirati. Vaš nije. Ja mislim da je vaš stav takav da bi vi njih držali pod čvrstom kontrolom i da se mogu ljudi po-stavlja-ti u mjesne zajednice politički podobni. (ANA PEJIĆ – Vodite računa samo o vremenu. Isteklo vam je.) Evo ja završavam. Nema potrebe da se opet ovdje ponavljamo. Imali smo žestoku raspravu sad kada je bila. Sad ćemo opet imat. I opet ćemo imat kada bude amandman. I spreman sam raspravljat koliko god puta treba ali nećete mene dovođit u situaciju da ja nešto dijelim. Jer imaju pismeni dokazi za one koji su htjeli da dijele. I ako treba opet ćemo vadit, čitat i citirat. Sve što treba ja sam spreman al nećete mene dovođit u situaciju da hoću da dijelim. Ja hoću samo da mjesne zajednice depolitiziram i to je jedina ovdje ispravna stvar. I svi oni ovdje sad što govore (ANA PEJIĆ – Isteklo vam je vrijeme Omere.) ovo je dobro, ovo vam, ovi tam...Vi ste svi glasali za Statut a zna se da ovo stoji u Statutu. Ne svi ali oni koji su bili u prošlom sastavu jer je prošlo jednoglasno. Fala ljepo.

ANA PEJIĆ

Zahvaljujem se. Ispravka krivog navoda. Vijećnik Mirnes Ajanović. Izvolite.

MIRNES AJANOVIĆ

Hvala. Pa evo čuli ste svi. Prvo ispravka u dijelu što sam ja to netačno rekao? Isto to što hoće Omer hoće i HDZ i šta je to neistina? Šta se ima ovolko živčanit kad je potpuno čovjek rekao istu stvar? To sad što se on našao u tome i što je evidentno da je to ista politička ideja što to ja ne valjam? Drugo. Dajte mi da neko objasni. Znal on šta je on uopšte? On je vijećnik. Jel on političar il nije političar? Kakvo je to ono lupanje rukom? Nešto to agresivno. Ne-će se kaže politika to određivat kako će biti u mjesnim zajednicama.Pa ko će ba Omere? Ko će to određivat ako neće Gradsko vijeće? Hoćeš neku paralelnu strukturu i opet će bit nekakva plitika. Kakva je to depolitizacija mjesne zajednice jel to mi ko nevaljamo? To onda ti nevaljaš. Što ćeš ti ovdje uopšte ako ti smatraš da politika ne treba da odlučuje o mjesnim zajednicama?

A mi smo ti koji smo i-zašli kako lijepo rekoše kolege. Građani glasali i oni koji nisu prihvatili da bude onako kako oni glasaju. Šta je tu problem? Kod tebe postoji problem razumijevanja stvarnog stanja tvog stanja i svega ovoga što se događa unutar Bosne i Tuzle. Nerazumljivo je. Vidim i kolege reaguju pa se čude svi. Malo kada se vratiš kući pogledaj ovo, ove što si govorio izjave svakako na TV Tuzla. Ima RTV-7. Ima ova video prezentacija. I na Tuzla ba. Potpuno nepotrebno ulaziš u nešto i ti bukvalno sad evo tu gotovo je još malo si počeo i vikati suprotstavljati se Rezoluciji o suprotstavljanju podjele grada Tuzle i deklaracije objavljenim u Službenim glasnicima. Ovo smo mi napravili upravo da bi spriječili takve ko ti da to rade. Piše sve to što si ti sad radio mi osudili 2008. godine, trineste i šesneste. (ANA PEJIĆ – Vodite računa samo o vremenu.) Hvala predsjedavajuća.

ANA PEJIĆ

Zahvaljujem se. Replika. Vijećnik Šefik Husić. Samo recite kome replika? (ŠEFIK HUSIĆ – Omeru Berbiću.) U redu. Izvolite.

ŠEFIK HUSIĆ – vijećnik SDA – Stranke demokratske akcije

Ma vidite opet se radi o apsurdno i očigledno o nepoznavanju što su ovi onaj, rukovodioci njihove stranke pokazali zadnjih dana. Znači, kaže: Apolitizacija onaj, mjesnih zajednica. Kako kad evo svi veći politički subjekti imaju mjesne odbore u sklopu mjesnih zajednica i naravno da će svi lobirati. Znači, ne znam kakva apolitizacija mjesnih odbora i davanje onaj, ljudima. Pa ljudi i glasaju naravno. A svi ti ljudi su otprilike znači, većim dijelom opredjeljeni za određene političke subjekte naravno ove veće, a ove manje...Mislom zbog toga je vjerovatno neki problem tu nasto. Tako da mislim da predsjedavajuća evo vas da zamolim da ne idemo dalje, da ne širimo rasprave. Evo već smo raspravljali i na Kolegiju itd. onaj, i na vanrednoj, vanrednom Kolegiju također onaj, utvrdili smo šta treba da, da uradimo u interesu građana i mislim da to trebamo uraditi. Onaj, a još jedna preporuka. Možda bi trebali imati defibrilator narednom periodu ovdje jer previše nam se ovaj kolega sikira. Da neće slučajno nedo Bog. A imamo evo doktora koji mogu reagovati.

ANA PEJIĆ

Zahvaljujem se. A obzirom da ste re...(OMER BERBIĆ – Ispravka krivog navoda.) Samo malo. Obzirom evo da ste tražili da ja zaustavim...Mislom ovo je...Rasprava je u toku i svi vijećnici imaju pravo na, na i na diskusije i na replike i ispravke krivog navoda. Ispravka krivog navoda. Vijećnik Omer Berbić.(OMER BERBIĆ – Kolegi Husiću.) Izvolite.

OMER BERBIĆ

Pa mislim evo ja njega ispravljam već drugu-treću sjednicu za redom. Apolitizacija i depolitizacija nije isto. Apolitizacija znači ravnodušnost prema politici. Kada ljudi ne žele da se bave politikom. Kada im politika ništa ne znači. Depolitizacija znači vađenje politike iz mjesnih zajednica da bi se građani kao individualni ljudi mogli kandidovati. E to je razlika. Ako treba mogu vam napisati referat na ovu temu. Nije ni to problem. Ako vam treba malo ovaj, malo mesa što bi se reklo. Al mislim možete me to vjerovatno i sami ako znate koristiti kompjuter. Apolitizacija i depolitizacija nije isto. Ja ovdje zagovaram depolitizaciju mjesne zajednice jer se u ovom Statutu građani mogu kandidovati bez obzira na političku pripadnost. Ovako političke stranke postavljaju što znači da će one postavljati 99% političke kadrove. A to ne daje mogućnost svim građanima ovog grada da se kandiduju i onim građanima koje politika

možda i ne zanima ali im je bitno da im je ulica čista, da imaju riješeno pitanje rupa na cesti i x-y drugih problema i to je razlika i zbog ovog iz ovog razloga samo ispravka krivog navoda. (MIRNES AJANOVIĆ – Poslovnička intervencija.)

ANA PEJIĆ

Zahvaljujem se. Isprav...Izvolite. poslovnička. Vijećnik Mirnes Ajanović.

MIRNES AJANOVIĆ

Mogu li ja pošto je poslovnička da zamolim nekog od kolega jer nemam vjerovatno priliku više za repliku ni ispravku krivog navoda jer je to već upotrebjeno poslovnička? Da zamolim nekog da mu objasni da su svi građani imali priliku na izborima da se prijave i kao pojedinci i samostalni vijećnici. Pa samo mu recite to da čovjek zna. Očito da ne zna on ni to. Da su svi imali pravo u mjesnim zajednicama...(ANA PEJIĆ – Samo malo. Sačekajte. Bez dobacivanja. Ovo ne može biti poslovnička tako da ovaj...) Eto neću više.

ANA PEJIĆ

Imate mogućnost ispravku krivog navoda ali evo iskoristit ćemo da je to u biti. Ispravka krivog navoda. Vijećnik Šefik Husić. Izvolite.

ŠEFIK HUSIĆ

Ma evo opet da kažem. Mislim...(ANA PEJIĆ – Ispravka kome? Opet Omeru Berbiću.) Omeru Berbiću. Znači, očigledno da čovjek ne zna o čemu govori. Da ne zna onaj, slušat druge. Da sluša samo sebe i stalno se ponavlja uporno onaj. Mislim da još jedna preporuka. Možda bi trebali imat jednog psihologa najmanje ovdje da malo analizira onaj, ponašanje da možda nekome preporuči neku terapiju i tako.

ANA PEJIĆ

Zahvaljujem se. Sljedeći za diskusiju javio se vijećnik...Sačekajte malo. Jel tražite...? U redu je kolega.

**MENSUR ALIĆ - zamjenik predsjedavajućeg
Gradskog vijeća Tuzla
- vijećnik Tuzlanske alternative –**

Mogu li ja vas nešto zamoliti kao vijećnike i vijećnice? Mi ćemo raditi otprilike do šest sati. Dalje nećemo moći. Ali ćemo morat zakazat nastavak redovne sjednice. Da li nam se isplati da radimo dva, dva dana? Ja bih vas zamolio da skratite diskusije, da se ne ponavlja. Čitavo vrijeme evo od jutros slušam istu priču i slušali smo i na Kolegiju. Pa dajte da budemo malo parlamentarni. Da uvažavamo jedndruge. Da ne vrijeđamo. Da pređemo direktno na tačku dnevnog reda. Završimo kratko i jasno. Idemo na glasanje. Da idemo na glasanje. Dajte odustanite svi od daljih diskusija. Sve se ponavlja isto. Uzmite pogledajte ovo ako je snimilo pa ćete vidjeti šta danas doživljavamo. Nemojte više. Ipak mislim da ovo Vijeće zaslužuje malo drugačiji tretman. Hvala.

ANA PEJIĆ

Zahvaljujem. Sljedeći za riječ se javio vijećnik Emir Šahović. Neka se pripremi vijećnik Mirel Mišković. Izvolite.

EMIR ŠAHOVIĆ – vijećnik Pokreta demokratske akcije - PDA

Pa ja, ja bih da odustanem od, od svog prava na diskusiju i pozvao bih sve kolege koji su se javili nakon mene da odustanemo. Jedanaest nas je u Kolegiju potpisalo i mislim da nema dileme tu kada je u pitanju usvajanje ove tačke. Hvala vam.

ANA PEJIĆ

Zahvaljujem se. Sljedeći za riječ se javio vijećnik Mirel Mišković.

MIREL MIŠKOVIĆ – vijećnik Demokratske fronte - DF

Evo ja ću samo kratko dvije rečenice. Ovo za Klub Demokratske fronte nije uopšte nikakva izmje-na Statuta. Ovo je za nas u stvari jedna dopuna Statuta da nemamo vakuma u mjesnim zajednicama u ovom prelaznom periodu. Izbori u mjesnim zajednicama u Statutu ostaju. Ti Omere sa svojom većinom se potruđi da se oni provedu što prije i mi nemamo nikakav problem s time. Samo ne treba ostaviti mjesne zajednice u ovom prelaznom periodu mjesec, dva, tri, pet da nemaju savjeta, da nema nikog, da sekretari ostanu sami na cjedilu. Evo mi sa-mo dopunjavamo Statut s ovom, s ovim članom da ovaj, nemamo vakum u mjesnim zajednicama. I molio bih da se ovo ne spinuje da mi ukidamo izbore u mjesnim zajednicama. Znači, oni se ne ukidaju. Ostaju u Statutu. Samo kad se steknu uslovi nek se sprovedu. A većina ima te mehanizme. Oni mogu to sprovesti i u martu-aprilu kad god žele. Evo mi smo spremni kao opozicija da to ispoštujemo. Evo. Toliko.

ANA PEJIĆ

Zahvaljujem se. Zaključujem raspravu Klubova vijećnika.
Ispred vijećnika nema prijavljenih i dajem pauzu od 5 minuta. (Pauza.)

Pozivam vijećnike da uđu u salu kako bismo nastavili sa radom.

Pozivam vijećnike da uđu u salu da nastavimo sa radom.

Pozivam vijećnike koji su u sali tamo da uđu. Janjo možete li molim vas pozvati sve vijećnike koji nisu u sali da uđu jer treba da se izjašnjavamo?

S obzirom da smo iscrpili i diskusiju Kluba i diskusiju vijećnika.

Stavljam na izjašnjavanje prijedlog da Gradsko vijeće Tuzla donese Odluku o promjeni Statuta Grada Tuzla, te vas pozivam da se izjasnite. Molim vijećnika Mirnesa Ajanovića da glasa. Glasanje je okončano.

Konstatujem da je **PRIJEDLOG DA GRADSKO VIJEĆE TUZLA DONESE ODLUKU O PROMJENI STATUTA GRADA TUZLA** usvojen sa,
29 glasova za, jednim protiv i nije bilo suzdržanih.

(OMER BERBIĆ – Ja ispred Kluba Naše stranke tražim pauzu od 3 minute.) 3 minute?
Dajemo pauzu od 3 minute na prijedlog Kluba Naše stranke. (SLAĐANA KRAJINA – Moramo. Moramo zaključak. Moram zaključak.) (OMER BERBIĆ – U stvari jel sad Program rada ili je...?) (NATAŠA PERIĆ – Nije. Osuda.) (OMER BERBIĆ – Aha. Okej. Okej. Povlačim pauzu.) Pa hoćete pauzu il nećete pauzu? (OMER BERBIĆ – Neću pauzu.)

Zamolit ću samo sekretara Gradskog vijeća da pročita zaključak vezano za tačku donošenje Odluke o promjeni Statuta Grada Tuzla.

SLAĐANA KRAJINA – sekretar Gradskog vijeća Tuzla

- Gradsko vijeće Tuzla traži od Komisije za statutarna pitanja i propise da, u skladu sa članom 161. Statuta Grada Tuzle (“Službeni glasnik Grada Tuzla”, broj 6/21) pripremi Nacrt akta o promjeni Statuta Grada Tuzle.

ANA PEJIĆ

Stavljam na izjašnjavanje pročitani zaključak. Glasanje je okončano.
Konstatujem da je pročitani zaključak dobio potrebnu većinu,
29 glasova za, nije bilo protiv i nije bilo suzdržanih.

IZVOD IZ STENOGRAMA SAČINILA:

Jasminka Delalić